

## Parlamento Hubenil

## Joseph Zambrano a bira Minister Hubenil Asuntonan Social 2009



**ORANJESTAD-** Diasabra ultimo Parlamento Hubenil a organisa un debate na Instituto di Cultura pa asina por reeligi un Minister Hubenil Asuntonan Social (MHAS) cu na final a sobresali Joseph Zambrano cu lo bai eherce su funcion awo pa un aña como MHAS. E participantenan tawata Joseph Zambrano, Aimee Leo, Victor Yarzagaray y Lorenzo Dirksz. E debate tawata tin como moderadora Cheraldine Muller, y huradonan Eric Lake, Hellen van der Wal, Madeline Ridderstaat, Richienel Stamper y Stanley Heinze. E programa a cuminsa cu himno canta pa Edjean y Jeanedy Semeleer y Mitchell Tromp, sigui pa un actuacion unda a ilustra diferente camindanan malo cu un mucha cu ta lanta den un famia kibra of violento por tuma. Enid de Kort di departamento Asunto Social despues a duna un speech tocante con hopi importante e ta pa tin un famia uni y

tambe riba reenfortamento riba e talentonan di un hoben. Cada participante mester a duna un speech di con nan lo kier wak Aruba den futuro den nos area social. E ponencianan di e debate a trese diferente discucionnan dilanti manera hopi hoben no ta kere cu nan tin e capacidad of talento pa logra nan metanan den bida y ta prefera di 'guli manda abou', cu hopi biaha otro hende no ta ni worry pa haya sa kico e mucha su talento ta y pa busca con pa yud'e desaroye. Otro ponencianan cu nan mester a debati riba dje tawata si e hobennan di Aruba ta sinti nan mes Arubiano orguyoso y no ta carga e 'cultura Arubiano' p.e. nos idioma, tambe si nos hobennan no ta haya e oportunidad pa presenta nan opinion encuanto e futuro di nos pais, tambe si nos hobennan ta kere cu uso di marihuana no ta un problema ya cu na Hulanda si e ta aceptabel, y tambe riba e asunto di criminalidad



bou nos hobennan.

E publico tambe a haya chens pa duna nan opinion riba kico nan ta kere mester wordo hasi algo riba dje den e area social y nan a expresa p.e. embarazo hubenil, drop-outs, drogadiccion, pero tambe diferente reaccion riba e importancia pa enfoca mas ainda riba e bida familiar di e hobennan, diferente obstaculonan of abuso cu nan ta pasa den e relacion di famia, cu tin problema na cas y cu muchanan no ta haya oido na cas.

Awor cu Joseph Zambrano a bira e Minister Hubenil Asuntonan Social ya caba e tin e proyecto pa tuma over



'PH den Bo Bario' cu ta un proyecto pa traha hunto cu e Centro di Barionan rond di Aruba. Tambe e Minister Hubenil por bin cu proyectonan nobo y pa esaki

tambe publico por semper duna opinion riba kico ta kere cu e Minister Hubenil aki mester bai enfoca riba dje. Por hasi esaki na e-mail: mhasaruba@gmail.com.